

菽莊林先生暨德配雲環龔夫人五十壽言

文

孫傳芳

余自束髮奔走四方獲交海內通才碩彥卽聞有閩中菽莊林先生爲當代人傑常思欲一見其人而未得其便洎提師南來始得與黃君菊三相見談次詢及先生爲人何如黃君卽爲余言先生立身行己挺挺大節有異於流俗所爲者至于經濟大略所至有

益於人凡閩中人士俱能言之黃君爲人篤實長者
所言決不妄余用是益知先生之賢今歲甲子先生
年五十矣五月吉日爲先生覽揆之辰凡與先生雅
故皆欲製文以獻命予主其事予素不文徒以迫于
平生嚮往之誠藉此得以抒其胸中之所欲言者幸
何如也故且樂而爲之雖屬詞弗工不免爲文人學
士所譏勿卹也先生世居臺陽爲時甫太僕公之哲
嗣自其少時爲貴公子器宇嚴重而不染於少年紈

袴之習讀書不喜爲章句之學每于古來治亂興亡之迹必反覆而思其所以然而攷求其得失之所在甲午中東之役先生隨太僕公來居廈門時光緒季年柄國非人亂象已見而一時士大夫方沉溺於科舉之業無有以國事爲意先生乃與有志之士日相與研求強國庇民之術每慨然惜其既往而策其將來會清朝命王參議清穆攷察東南商務路出廈門與先生語大異之以爲聞所未聞因力薦之於朝且

力言今天下方多事非破格用人不可先生遂以道員奉召入京以京堂內用旋奉命總理廈門商務善於其職既而復充礦務議員又經度支部派充幣制調查員農工商部復舉爲頭等顧問官是時先生已擢侍郎指日可大用無何武漢事起先生知事無可爲遂跼伏不出其時朝中執大權者或素耳先生名皆馳書勞問力勸爲出山之計先生知亂事方始太平之期未可計日以待遂堅辭不應與二三遺老日

以觴咏爲樂不復與聞外事其德配龔夫人長先生
一歲爲晉江詠樵贊善之女公子婉孌有賢德與先
生白首相莊見者疑灞陵韻事尙在人世有子七人
皆英挺秀出蔚爲國器所以大先生之業者將於是
乎在方先生四十時海內文人學士相率爲介壽之
作鴻篇雅製彙成巨冊余嘗取而讀之竊嘆古稱言
以人重者此類是也今者先生年五十欲壽先生又
不欲襲前人之所已言者請卽從五十立義可乎聖

人有言加我數年五十以學易可以無大過矣此在未五十之前故有加我數年之說後篇則云五十而知天命此則在既五十之後知天命一語卽可爲無大過註脚所以自道生平讀書得力所在兼示學者讀易之益其詞意固自明顯宋儒好以破字解經於義究不可通夫聖人之專主學易爲言良以易之爲書其明於陰陽消長之機造化盈虛之理較之他經更爲詳盡其就人生所遇言之則曰或出或處或默

或語其於吾儒仕止之道昭然易見先生生平於進退之間殆無一不合於道原其所得於易爲近之雖居恆罕與人論易然昔人所云善易者不言易先生其亦有見於是者歟今日以職守所羈不獲一與稱觴之盛他日軍事餘閒得訪先生之廬而造焉過所謂菽莊者觀其亭臺竹木之勝退而與先生促坐深談聽其名言偉論以豁生平懷抱何快如之先生儻亦鑒余區區之意而不之拒也幸甚謹序

薩鎮冰

疇昔中東之役海軍不振予方從事艤舫惄然憂之
聞我菽莊先生與其姁戚張君煜南昆仲輸鉅款以
助海軍此舉雖爲桑梓盡力卽爲國家盡力予由是
仰先生之爲人比年往來閩厦因得與先生款洽今
歲夏歷五月十八日爲先生五十覽揆之辰諸子稱
觴上壽屬予爲文以侑爵予不敢以不文辭先生世
居臺陽曾祖石潭公官郡守祖樞北公官部曹尊甫

時甫公官太僕寺卿名門勲閥海嶠咸欽太僕公在
日嘗與呂西邨謝琯樵諸名宿游先生幼而岐嶷博
通經史見者皆以爲大器而先生不屑章句之學謂
處今日交通時代當淹貫中西而後爲國家有用之
才甲午清廷議割全臺先生隨太僕公挈眷內渡居
於廈嶼太僕公遺產在臺促先生東渡襲業先生讓
於仲氏願晨夕侍太僕公左右人莫不重其孝友先
生夙精商業常倡辦樟腦金沙煤鑛茶利以收外溢

之漏卮又設機器廠購汽船造鐵路以便海外交通
及蒞廈迺於漳廈創辦電話墾牧廣福諸公司任廈
門商務總理凡六年其擘畫周詳收回利權食惠者
不下數萬家人以爲先生固實業中人先生顧爲實
業也者然曰擊世變恆儲用世之意朝右名公鉅卿
聞其名交章薦剡由道員擢京堂晉階卿貳歷官中
外措施之當幹濟之方有補於時者大而條陳利弊
一疏尤切時務惜不能用人遂以先生爲功名中人

先生顧爲功名也者泊武漢事起時局又一大變徵
先生者踵相接乃蜷伏不出視軒冕若泥塗於鼓浪
嶼築園臨海風濤叫嘯之鄉花木亭臺之勝青鞵布
韞徜徉其間怡然自得每逢佳時令節招文人墨客
互爲酬唱名其園曰菽莊其社卽爲菽莊吟社意有
所觸更徵海內能詩者唵筒郵達人又以先生爲高
士中人先生顧爲高士也者其實先生與時偕行無
施不可出而有益於人處而有得於己僅以一節揣

先生所見不已小哉德配龔夫人詠樵贊善之女嫻
禮教而工於詩自來嬪後迄今三十餘年與先生無
一違言先生姬侍滿前夫人皆善視之視庶出如己
出暇卽與先生聯步海壖憩於園之眉壽堂閒多得
句亦有刻於石上者閩中夫婦俱以詩名者紅橋之
作與鳴盛並傳近則繭窩與黃鵠山人之詩並行於
世今先生起而繼之眞孤山嫡派也先生子七人長
景仁教育部顧問其詩深得先生淵源著有摩達山

草天池草兩集不啻審言之後有少陵老泉之後有
軾轍也次剛義四崇智五履信皆畢業日本大學三
鼎禮六克恭七志寬皆留學英京劍橋大學先生方
四十卽抱孫今已有孫七人女孫六人充閭之慶萃
於一堂天之眷先生者亦先生德足以澤人仁足以
昌道是以受百祿而膺五福也予當兵事倥傯之會
勉徇衆意長我鄉邦而廈島一隅陷於鋒鏑者久今
下游敕定百事待理予毫無能爲先生正當服官之

年材力聰明百倍常人其壽考當未有艾也深望先生爲時而出以其所學措諸實用與鎮冰相助爲理更有以壽國壽人焉先生其爲我晉一觴乎

陳海梅

劉樊美眷人誇行地之仙瑜肅知交我是忘年之友
方幸梁園賓客座上延枚豈知牛黨嫌猜軍中斥李
賤子遂買舟歸里同儕亦息影閉門白雲馨香所思
遠道滄海契闊每懷故人蓋予往來於我菽莊先生

社中者固有年矣今歲夏歷五月十八日爲先生暨
德配龔夫人五十雙慶之辰嗣君景仁書來乞言予
維先生童烏性慧雛鳳聲清延世德於雀環溯先芬
於龍廐金題鈿軸少工石介之文黃榜紫標大啓蕭
宏之第翹首望青雲之路何難拾艾功名出山作霖
雨之思不屑雕蟲文字乃溝瀆已歸橘勝誰縱天驕
朝廷議棄珠崖坐捐海郡甲午中東之役先生從太
僕公內渡太王創業原因避狄而來少伯成名曾作

徙家之計河山典午一時之風景全非花木平泉重
起之樓臺有地太僕公勸以東歸故里藉襲厚貲先
生薄郭家之金穴願與父居讓薛氏之腴田自有弟
在富貴若浼孝友可風斯亦難矣乙巳先生被推爲
廈門商會總理立河間之五均自占司市采南交之
百利罕有算緡裴耀卿之處長安直絕僦欺之弊李
士衡之籌京路不索和買之需任通商者未逾六稔
計受惠者不止萬家時清廷議振海軍先生首輸鉅

款復亨以遺產濟師世祖嘉其愛國崇韜因軍錢率衆梁臣知無營私卜式輸邊非爲侯計王丹上麥樂爲人先正九重求士之時得當路交章之薦遂由道員擢居京堂晉秩侍郎乃進賢受上賞方與大夫同升而求志在隱居斷非貲郎可比陳前席治安三策太息留中問烏臺富貴一場有如說夢及歸廈門爲福建全省鑛務並調查幣制大員讀平準之書貨憂棄地識金銀之氣寶在不貪推食解衣傾眞客之囊